



ՀԱՅԿԱԿԱՆ ԱՏՈՄԱՅԻՆ ԷԼԵԿՏՐՈՆԿԱՅԱՆԻ ԱԶԴԵՑՈՒԹՅԱՆ ԳՈՏՈՒՄ ԳՏՆՎՈՂ
ՀԱՄԱՅՆՔՆԵՐՈՒՄ ԱՆՑԿԱՅՎԱԾ ՍՈՑԻԱԼԱԿԱՆ ՀԵՏԱԶՈՏՈՒԹՅԱՆ ՄԻՋԱՆԿՅԱԼ
ՀԱՇՎԵՏՎՈՒԹՅՈՒՆ

Երևան 2019թ.

ՆԱԽԱԲԱՆ

Սույն հետազոտության նպատակն է Հայկական ատոմային էլեկտրոկայանի (այսուհետ ՀԱԷԿ) 5-10 կմ շառավղով ազդեցության գոտու համայնքերում

1. Պարզել՝

- ռադիացիոն վտանգներին տվյալ համայնքի բնակիչների դիմակայելու պատրաստվածության մակարդակը
- տվյալ համայնքում տարերային աղետների, ռազմական իրավիճակների, ՀԱԷԿ-ի միջուկային և (կամ) ճառագայթային վթարների դեպքում բնակչության համար նախատեսված թաքստոցների և ապաստարանների, այդ թվում հակաճառագայթային թաքստոցների առկայությունը, ինչպես նաև դրանց համապատասխանության ֆունկցիոնալ աստիճանը
- առաջին անհատական պաշտպանական պարագաների առկայությունը տվյալ համայնքում
- տվյալ համայնքում մթնոլորտային օդի, ջրի և հողի աղտոտման մշտադիտարկման գործընթացների իրականացումը և արդյունքների վերաբերյալ բնակչության տեղեկատվածության աստիճանը
- բնակչության սոցիալական պաշտպանվածության, ինչպես նաև պետության ու ՀԱԷԿ-ի կողմից ստացվող սոցիալական օժանդակության մակարդակը
- ՀԱԷԿ-ի վերաբերյալ որոշումների կայացման գործընթացներում տեղի բնակչության ներգրավվածության աստիճանը
- ՀԱԷԿ-ի զարգացման ծրագրերով համայնքներին ցուցաբերվող աջակցության ցուցանիշները:

2. ՀԱԷԿ-ի ազդեցության գոտու բնակիչներին ծանոթացնել՝

- ճառագայթային և էկոլոգիական անվտանգությանը ներկայացվող պահանջներին
- ատոմային էներգետիկայի ոլորտում Հայաստանի Հանրապետության նոր քաղաքականության հիմնական որոշումներին և զարգացման հեռանկարներին
- ոլորտում ազդակիր բնակչության կարծիքներն ու առաջարկները ներկայացնելու մեխանիզմներին:

Հետազոտությունն իրականացվել է 2018-2019թթ.: Հետազոտությունը կատարվել է «ԷկոԼուր» տեղեկատվական հասարակական կազմակերպության թիմի և ներգաված կամավորների կողմից՝ «Հանուն Հարավային Կովկասում էներգետիկ պարադիգմի փոփոխությունների» ծրագրի շրջանակներում, դոնոր՝ Brot für die Welt Protestant

Development Service, sub grant - Green Alternative (Վրաստան):

Կազմված հարցաթերթիկի (16 հարց) լրացման միջոցով սոցիալական հարցախույզի է ենթարկվել 67 տեղացի բնակիչ և 12 տեղական ինքնակառավարման մարմնի ղեկավար, վերցվել են ոլորտի վերաբերյալ հարցազրույցներ տեղական ինքնակառավարման մարմինների ղեկավարներից և համայնքի բնակիչներից:

ԳԼՈՒԽ 1. ԸՆԴՀԱՆՈՒՐ ՏԵՂԵԿԱՏՎՈՒԹՅՈՒՆ

1.1. ՀԱԷԿ-Ի ՄԱՍԻՆ

Հայկական ԱԷԿ-ի հրապարակը գտնվում է Արարատյան դաշտի արևմտյան մասում՝ Արմավիր շրջկենտրոնից 10 կմ դեպի հյուսիս-արևելք, Երևանից 28 կմ դեպի արևմուտք, Թուրքիայի սահմանից 16 կմ հեռավորության վրա: ՀԱԷԿ-ը բաղկացած է երկու էներգաբլոկներից՝ ՋՋԷՌ-440 տիպի (B-270 մոդելի) ռեակտորներով: ՀԱԷԿ-ի առաջին էներգաբլոկն արդյունաբերական շահագործման հանձնվեց 1976թ-ին, իսկ երկրորդը՝ 1980թ-ին: Էներգաբլոկների դրվածքային հզորությունը կազմում է 407,5ՄՎտ, շահագործման նախագծային ժամկետը՝ 30 տարի: ԽՍՀՄ մինիստրների խորհրդի որոշմամբ Սպիտակի ավերիչ երկրաշարժից հետո՝ 1989թ. փետրվարին և մարտին, կանգնեցվեցին №1 և №2 էներգաբլոկները: ԽՍՀՄ փլուզմանը հաջորդող քաղաքական կատակլիզմները 1990-1993թթ. հանգեցրեցին Հայաստանի շրջափակմանը և որպես դրա հետևանք՝ հանրապետության ծանր էներգետիկ ճգնաժամի: Ստեղծված իրավիճակով էր պայմանավորված միակ ընդունելի որոշումը՝ վերսկսել Հայկական ԱԷԿ-ի աշխատանքը:

1993թ. Հայաստանի կառավարությունն ընդունեց ՀԱԷԿ-ի №2 էներգաբլոկի շահագործումը վերսկսելու վերաբերյալ որոշում: Նորոգման ու վերականգնման աշխատանքները և անվտանգության բարձրացմանն ուղղված միջոցառումներն իրականացնելուց հետո 1995թ. նոյեմբերին №2 էներգաբլոկը միացվեց էներգահամակարգին: №1 էներգաբլոկը գտնվում է երկարատև կանգի ռեժիմում: Էներգաբլոկի վերագործարկում չի նախատեսվում: Հայկական ԱԷԿ-ի մասնաբաժինը հանրապետությունում արտադրվող էլեկտրաէներգիայի ընդհանուր արտադրության մեջ կազմում է մոտ 35-38%:

ՀՀ կառավարությունը 2012թ. ապրիլի 19-ին ընդունել է ՀԱԷԿ-ի N 2 էներգաբլոկի շահագործման նախագծային ժամկետը երկարացնելու մասին N 461- Ն որոշումը:

Միջուկային ռեակտորի հովացման համար ՀԱԷԿ-ն օգտագործում է Սևջուր գետի և Արարատյան ստորգետնյա հորերի արտեզյան ջրերը: Սևջուր գետի հոսքը վերջին

շրջանում խիստ նվազել է՝ կապված Արարատյան դաշտի ստորգետնյա ջրային աղբյուրների գերշահագործման հետ: 1983 թ-ին Սևջուր գետի հոսքը (Սևջուր-Ակնալիճ աղբյուրների միջին ծավալից առաջացած) գնահատվում էր 17.8 խմ/վրկ: 2013թ-ին այն կազմել է ընդամենը 3 խմ/վրկ, 2018թ-ին՝ 0,5 խմ/վրկ: Մինչդեռ ատոմային էլեկտրակայանի գործող էներգաբլոկի միջուկային ռեակտորի սառեցման համար պահանջվում է 1 խմ/վրկ ջուր: Նոր էներգաբլոկի կառուցման դեպքում կպահանջվի երկու անգամ ավելի շատ ջուր: ՀԱԷԿ-ի ջրի կարիքները բավարարելու նպատակով 2013 թվականին հորատվել է 3 հորատանցք: Նախատեսվող մյուս հորատանցքերի փորումը ընթացքի մեջ է, սակայն ասել, որ դա կլուծի խնդիրը, միանշանակ չէ, քանի որ շարունակում են իջնել այդ հորերի սնման աղբյուրներ հանդիսացող ստորերկրյա ջրերի հորիզոնները:

Խորհրդային տարիներին աշխատած միջուկային վառելիքը փոխադրվում էր Ռուսաստան երկաթուղու միջոցով հատուկ նախատեսված և կահավորված վագոնով: Հայաստանում երկաթուղիների շրջափակումից հետո աշխատած միջուկային վառելիքի փոխադրումը

Ռուսաստան

դադարեց:

Ներկայումս աշխատած միջուկային վառելիքը և ռադիոակտիվ թափոնները ժամանակավորապես պահվում են ՀԱԷԿ-ի տարածքում: Այդ օբյեկտների տարողունակությունը սահմանափակ է: ՀԱԷԿ-ի աշխատած միջուկային վառելիքը Հայաստանից ՌԴ տեղափոխելու հարցը Հանրապետությունում օրակարգային է: Նախատեսվում է աշխատած միջուկային վառելիքի՝ Ռուսաստանի Դաշնություն արտահանման և հետագա վերամշակման պիլոտային ծրագիր: Ծրագրի իրականացման նպատակով ստեղծվել է հայ-ռուսական համատեղ աշխատանքային խումբ՝ տեխնիկատնտեսական և տրանսպորտատեխնոլոգիական սխեմայի ուսումնասիրություններ

իրականացնելու

համար:

Բնապահպանության ոլորտում իրականացվող քաղաքականության վերաբերյալ «Հայկական ատոմային էլեկտրակայան» ՓԲԸ-ի ղեկավարությունը հայտարարագրել է հետևյալ

սկզբունքները.

- շրջակա միջավայրի օբյեկտների կենսաբանական, հիդրոքիմիական, հիդրոերկրաբանական վիճակի, ճառագայթումային ֆոնի հսկման կազմակերպման միջոցով ՀԱԷԿ հարակից տարածքների էկոլոգիական հսկողության անցկացում

- բնակչությանը ՀԱԷԿ-ի հարթակի և հարակից տարածքների շրջակա միջավայրի վիճակի վերաբերյալ բաց, ստույգ տեղեկության տրամադրում:

1.2. ՄԻՋՈՒԿԱՅԻՆ ԵՎ (ԿԱՄ) ՃԱՌԱԳԱՅԹԱՅԻՆ ՎԹԱՐՆԵՐԻ ԴԵՊՔՈՒՄ ԲՆԱԿՉՈՒԹՅԱՆ ՊԱՇՏՊԱՆՈՒԹՅԱՆ ՄԱՍԻՆ

Ատոմակայանի անվտանգ շահագործման ռիսկերի թվում իր մեծ տեղն ունի ՀԱԷԿ-ի անվտանգության գոտու խիտ բնակեցվածությունը: Առաջնահերթ է բնակիչների անվտանգության ապահովումը: Միջուկային և (կամ) ճառագայթային վթարների դեպքում բնակչության անվտանգության կազմակերպումը կարգավորվում է ՀՀ օրենսդրությամբ՝ «Խաղաղ նպատակներով ատոմային էներգիայի անվտանգ օգտագործման մասին», «Արտակարգ իրավիճակներում բնակչության պաշտպանության մասին», «Քաղաքացիական պաշտպանության մասին» ՀՀ օրենքներով և Հայաստանի Հանրապետության կառավարության 2004 թվականի դեկտեմբերի 30-ի «Հայաստանի Հանրապետությունում միջուկային և ճառագայթային վթարների հակազդման պատասխանատվության մասին» N 1953-Ն, 2000 թվականի սեպտեմբերի 28-ի «Բնակչության պատսպարման կարգը հաստատելու մասին» N 592 և 2000 թվականի հոկտեմբերի 25-ի «Բնակչությանն անհատական պաշտպանության միջոցներով ապահովելու կարգը հաստատելու մասին» N 679 որոշումներով: Կառավարության վերոհիշյալ որոշումներով հաստատվել են Հայկական ատոմային էլեկտրակայանի 30 կիլոմետրանոց գոտում բնակվող բնակչության հակաճառագայթային թաքստոցներում պատսպարման համալիր միջոցառումները և պատսպարման կարգը:

ՀՀ օրենսդրությամբ վտանգի մասին բնակչության ազդարարման, տարահանման ու տեղաբաշխման, պատսպարման և անհատական պաշտպանության միջոցներով ապահովման նախապատրաստական և հիմնական միջոցառումների իրականացման լիազորությունները վերապահված են պետական կառավարման և տեղական ինքնակառավարման մարմիններին և կազմակերպություններին: Այս համակարգի հիմնական դերակատարն է Արտակարգ իրավիճակների նախարարությունը:

ՀԱԷԿ-ի ազդեցության գոտին սահմանված է ՀԱԷԿ-ի միջուկային կամ ճառագայթային վթարների դեպքում բնակչության պաշտպանության ազգային պլանով, որը հաստատված է ՀՀ կառավարության կողմից 2005 թ-ի դեկտեմբերի 22-ին ընդունված «Հայկական ատոմային էլեկտրակայանի միջուկային և (կամ) ճառագայթային վթարների դեպքում բնակչության պաշտպանության ազգային պլանը (Հայկական ատոմային էլեկտրակայանի արտաքին վթարային պլան) հաստատելու մասին» N 2328-Ն որոշմամբ: Պլանի համաձայն՝ նախահարձակ անվտանգության ապահովմանն ուղղված կանխարգելիչ միջոցառումներ նախատեսված են ՀԱԷԿ-ից 5 կմ շառավղով: Իսկ շտապ միջոցառումների պլանավորման գոտին նախատեսված է ՀԱԷԿ-ից 5-10 կմ շառավղով: Նշված չափանիշներով ազդեցության գոտում ներառված է 25 համայնք:

Որոշմամբ սահմանվել են նաև պետական կառավարման մարմինների գործողությունները, բնակչությանը կայուն յոդի պատրաստուկների և անհատական

պաշտպանության միջոցների բաշխման կարգերը, ինչպես նաև վթարների դեպքում բնակչության պատսպարման վայրերը:

ՀՀ կառավարության 22 դեկտեմբերի 2005թ. N 2328-Ն որոշման¹ Հավելված 1-ի համաձայն.

- Վահանաձև գեղձի արգելափակման համար նախատեսված կայուն յոդի պատրաստուկների անհրաժեշտ քանակությունը տրվում է *նախահարձակ պաշտպանական միջոցառումների իրականացման* (ՀԱԷԿ-ին հարակից 5 կմ շառավղով տարածք *այսուհետ՝ ՆՊՄԻ գոտի*) և *շտապ պաշտպանական միջոցառումների պլանավորման* (ՀԱԷԿ-ին հարակից 5-10 կմ շառավղով *(այսուհետ՝ ՇՊՄՊ գոտի)* գոտիների համայնքների բնակչությանը և պահպանվում նրանց մոտ, ինչպես նաև՝ կազմակերպության ղեկավարներին՝ ըստ աշխատողների թվի (կետ 8):
- Բնակչության պաշտպանության համար նախատեսված անհատական պաշտպանության միջոցները ՆՊՄԻ և ՇՊՄՊ գոտիներում գտնվող համայնքների բնակչությանը բաշխվում են նախօրոք և պահպանվում նրանց մոտ, ինչպես նաև տրվում են կազմակերպության ղեկավարներին՝ ըստ աշխատողների թվի (կետ 9):
- Վթարային արձագանքող ստորաբաժանումները նախապես ապահովվում են կայուն յոդի պատրաստուկներով, անհատական պաշտպանական միջոցներով, անհատական դոզիմետրերով, ռադիոմետրիկ սարքավորումներով՝ մոնիթորինգ անցկացնելու համար, և յուրաքանչյուր 6 ամիսը մեկ անգամ անցնում են ուսուցում (կետ 10):
- Բնակչության պատսպարման համար ՆՊՄԻ և ՇՊՄՊ գոտիներում օգտագործվում են ապաստարաններ, թաքստոցներ և պարզագույն պաշտպանական կառույցներ, ինչպես նաև մարդկանց տներն ու բնակարանները, բնակելի շենքերի առաջին և նկուղային հարկերը, որոնք պետք է նախօրոք և վտանգի առաջացման դեպքում անմիջապես հարմարեցվեն այդ նպատակին (կետ 10):

ՀՀ ներկա կառավարությունը, վերլուծելով գործող իրավական ակտերի՝ ՀՀ կառավարության 2000 թվականի սեպտեմբերի 28-ի «Բնակչության պատսպարման կարգը հաստատելու մասին» N 592 և 2000 թվականի հոկտեմբերի 25-ի «Բնակչության անհատական պաշտպանության միջոցներով ապահովելու կարգը հաստատելու մասին» N 679 որոշումների կատարողականի ցածր ցուցանիշները, իր 2019-2023 թվականների գործունեության միջոցառումների ծրագրում ներառել է ոլորտում տիրող իրավիճակի շտկմանն ուղղված գործողություններ և նախատեսում է իրականացնել

¹ <http://www.arlis.am/DocumentView.aspx?docid=22060>

պաշտպանական կառույցների ֆոնդի կուտակում, գոյություն ունեցող կառույցների պահպանում, նախապատրաստում և արդիականացում:

ՀՀ կառավարության 2019 թվականի մայիսի 16-ի «Հայաստանի Հանրապետության կառավարության 2019-2023 թվականների գործունեության միջոցառումների ծրագիրը հաստատելու մասին» N 650-Լ որոշման հավելված 1-ի 84-րդ կետով նախատեսվում է «Բնակչության պաշտպանության ոլորտի կատարելագործում» միջոցառումը, և հանձնարարված է մինչև 2020 թվականի սեպտեմբերի 2-րդ տասնօրյակը մշակել «Բնակչության պատսպարման հայեցակարգը հաստատելու մասին» ՀՀ կառավարության որոշման նախագիծը և այն ներկայացնել վարչապետի աշխատակազմ: Նույն որոշման Հավելված 2-ով տրված է ոլորտի ներկա գնահատականը. «Հայաստանի Հանրապետության անկախացումից հետո բաց է մնացել քաղաքացիական պաշտպանության պաշտպանական կառույցների՝ մասնավորապես ապաստարանների և հակաճառագայթային թաքստոցների իրավական կարգավիճակի հստակեցման հարցը, որի արդյունքում բազմաթիվ պաշտպանական կառույցներ օտարվել են, փոխվել է դրանց օգտագործման նպատակային նշանակությունը, և ներկայում անհրաժեշտ է իրականացնել պաշտպանական կառույցների նախապատրաստում, կահավորում, պահպանում, բարեկարգում և դրանց արդիականացում: Անհրաժեշտության դեպքում բնակչության պատսպարումը հիմնականում նախատեսված է իրականացնել բնակելի շենքերի նկուղային հարկերում, որոնք ներկայում մեծամասամբ զբաղեցված են բնակիչների կողմից և օգտագործվում են որպես խորդանոցներ»:

1.3. ՀԱԷԿ-Ի ՀԱՐԱԿԻՑ՝ 5-10 ԿՄ ՇԱՌԱՎՂՈՎ ՏԱՐԱԾՔՈՒՄ ԸՆԴԳՐԿՎԱԾ ՀԱՄԱՅՆՔԵՐԻ ՄԱՍԻՆ

ՀՀ կառավարության N 2328-Ն որոշմամբ ՀԱԷԿ-ի ՆՊՄԻ և ՇՊՄՊ գոտիներում ընդգրկված է 95771 բնակչությամբ 25 համայնք՝ ՀՀ Արմավիրի մարզից 22 և Արագածոտնի մարզից՝ 3 համայնք:

Համայնքերը և բնակչության թվաքանակը 2008թ. հունվարի մեկի դրությամբ հետևյալն են՝

Արմավիրի մարզում՝ ք.Արմավիր - 32500, ք.Մեծամոր - 10200, գ.Արշալույս - 4362, գ.Ակնալիճ - 3273, գ.Մայիսյան - 1819, գ.Ֆերիկ - 257, գ.Առատաշեն - 2996, գ. Աղավնատուն - 3450, գ.Արագած - 3274, գ.Արտաշար - 1430, գ.Արևիկ - 2667, գ. Եղեգնուտ - 1853, գ.Զարթոնք - 2253, գ.Խորոնք - 2735, գ. Ծաղկալանջ - 1396, գ.Ծիածան - 1232, գ.Հայթաղ - 2968, գ.Հովտամեջ - 1351, գ.Սրգաշատ - 6339, գ.Նորավան - 1150, գ. Գեղակերտ - 3143, գ.Տարոնիկ - 2086:

Արագածոտնի մարզում՝ գ. Արագածոտն - 1109, գ. Նոր Ամանոս – 806, գ. Նոր Եղեսիա – 1122:

ՀԱԷԿ-ին վերաբերող կառավարության վերոնշյալ որոշումներում, սակայն, այդ համայնքերը չեն նշվում որպես «ազդակիր»: Դա նշանակում է, որ իրավական առումով սահմանված չէ դրանց կարգավիճակը, հետևապես տեղի բնակչությունը չի կարող դատական կարգով վիճարկել որևէ որոշում: ՀԱԷԿ-ն ընդգրկված չէ նաև «Ընկերությունների կողմից վճարվող բնապահպանական հարկերի նպատակային օգտագործման մասին» օրենքով ամրագրված կազմակերպությունների ցանկում, հետևապես համայնքները բնապահպանական և սոցիալական ծրագրերի իրագործման համար չեն կարող օգտվել այդ օրենքով նախատեսվող մասնահանումներից: Այդ գումարի տարեկան չափը ՀԱԷԿ-ի համար կազմում է 2,22 մլն. դրամ:

Նշված համայնքները հիմնականում գտնվում են Արարատյան դաշտում, և դրանք՝ բոլորն, ունեն գյուղատնտեսական ուղղվածություն:

Գյուղական համայնքներում տարիներ շարունակ արտադրվել են խաղող, ծիրան, դեղձ, սալոր, բանջար-բոստանային կուլտուրաներ, ինչը հանդիսացել է հումք նախկին պահածոների մի քանի գործարանների համար: Ներկայումս դրանք չկան, կան գյուղատնտեսությամբ զբաղվող մանր ու միջին տնտեսություններ, գյուղմթերքներ վերամշակող մի շարք փոքր հգործությամբ գործարաններ:

Վերջին տարիներին Արմավիրի մարզում ձկնային տնտեսություններն ունեն նվազման միտումներ՝ կապված Արարատյան ստորգետնյա ջրերի մակարդակի նվազման հետ: Ստորերկրյա ջրերի հորիզոնների իջնելու հետևանքով Արմավիրի մարզում փակվել է մոտ 40 ձկնային տնտեսություն: Մարզում ջրային հորիզոնների իջեցման արդյունքում նախկին ինքնաշատրվանող 136 հորերից ներկայումս ջրօգտագործողները ջրառն իրականացնում են պոմպերով՝ դրա համար կատարելով հավելյալ էներգետիկ ծախսեր: Վերջին տարիներին բարձրացել է ջրային ռեսուրսների հանքայնության աստիճանը՝ իջեցնելով հողերի բերքատվության մակարդակը: Առաջացել է գյուղատնտեսական հողերի աղակալում և անապատացում: Ծագել են նշանակալի մարտահրավերներ բնակչության հիմնական կարիքները բավարարելու, ջրային էկոհամակարգերը պահպանելու համար անհրաժեշտ քանակի և որակի վերականգնվող ջրային ռեսուրսների պահպանման և օգտագործման ոլորտում: Այս ամենի հետևանքով տարածաշրջանում առաջացել են սոցիալական լուրջ լարվածություն, խոցելի խմբեր և պետության ու ՀԱԷԿ-ի կողմից օժանդակության ակնկալիքներ:

ԳԼՈՒԽ 2. «ԷԿՈԼՈՒՐ» ՀԱՄԱՐԱԿԱԿԱՆ ԿԱԶՄԱԿԵՐՊՈՒԹՅԱՆ ԿՈՂՄԻՑ
ՀԱԷԿ-Ի ԱԶԴԵՑՈՒԹՅԱՆ ԳՈՏՈՒ 12 ՀԱՄԱՅՆՔՆԵՐՈՒՄ ԿԱՏԱՐՎԱԾ
ՀԵՏԱԶՈՏՈՒԹՅՈՒՆԸ

2018-2019թթ. ժամանակահատվածում ուսմանասիրություններ են կատարվել 12՝ Արմավիր և Մեծամոր քաղաքային, Արշալույս, Ակնալիճ, Առատաշեն, Արտաշար, Եղեգնուտ, Զարթոնք, Հովտամեջ, Մայիսյան, Մրգաշատ և Տարոնիկ գյուղական համայնքներում: Հանդիպումների ընթացքում մասնակիցներին բաժանվել են «Ինչպես պաշտպանել ինքներդ ձեզ միջուկային կամ ճառագայթային վթարների դեպքում» տեղեկատվական թերթիկներ: Հարցախույզի ընթացքում տեղեկատվական թերթիկներ փակցվել են նաև համայնքների հանրային վայրերում:

Տեղեկատվական թերթիկ

ԵՂԻՐ ԻՐԱԶԵԿ, ՈՐ ՊԱՇՏՊԱՆԵՍ ՔԵԶ ՃԱՌԱԳԱՅԹԱՅԻՆ ՎՏԱՆԳԻ ԴԵՊՔՈՒՄ

Եթե կլսեք «Ուշադրություն բոլորին, ուշադրություն բոլորին: Ճառագայթային վտանգ է սպառնում հետևյալ բնակավայրերին» չընդհատվող ազդանշանը, ապա՝

- Մ՝ի մատնվեք խուճապի
- Եթե ունեք զտոդ հակազագ, ապա հագե՛ք այն, իսկ եթե չունեք, հագե՛ք շնչադիմակ կամ ձեռքի տակ եղած միջոցներով (խոնավեցրած) փակե՛ք շնչուղիները
- Հակազագով կամ շնչադիմակով ապահովե՛ք առաջին հերթին ՁԵԶ, ապա՝ երեխաներին
- Վերցրե՛ք Ձեզ հետ առաջին անհրաժեշտության դեղամիջոցներն ու անձը հաստատող փաստաթղթերը
- Վերցրե՛ք Ձեզ հետ ամենաքիչը 2 օրվա համար անհրաժեշտ ջուր, սննդամթերք, իրեր
- Արագ պատսպարվե՛ք մոտակա թաքստոցում, կամ որևէ փակ շինությունում
- Պատսպարման վայրերից դու՛րս եկեք միայն հեռուստատեսության, ռադիոյի և շարժական բարձրախոս սարքավորումների միջոցով այդ մասին իրազեկվելուց հետո
- Հետագա գործողություններն իրականացրե՛ք ըստ համայնքի (գյուղապետարանի) փրկարարական շտաբի հրահանգների:

Եթե չեք հասցրել պատսպարվել թաքստոցում և մնացել եք տանը կամ աշխատավայրում, ապա՝

- Շտապ իրականացրեք տարածքի հերմետիկացման աշխատանքներ՝ ծածկեք դռներն ու պատուհանները և փակեք առկա ճեղքերը՝ օգտագործելով ձեռքի տակ եղած միջոցները
- Բարձրահարկ շենքերում գտնվելիս՝ շտապ իջեք վերին հարկերից և տեղ գրադեցրեք նկուղային տարածքներում կամ դրանց բացակայության դեպքում՝ շենքի առաջին հարկերում

Փողոցում և բաց տարածքներում գտնվելիս՝

- Թաքնվել ք մոտակա ապաստարանում կամ ճանապարհամերձ առվակների, հեղեղատարների համար նախատեսված կառույցներում, տարբեր տեսակի փոսորակներում, թմբապատնեշների և ոչ բարձր պատնեշների (պատերի) հետևում:

«ԷկոԼուր» տեղեկատվական ՀԳ

Բժժ. (+37491) 92 12 64

Էլ. հասցե՝ ecolurpressclub@gmail.com

Էլ. կայք՝ www.ecolur.org

Ֆեյսբուքյան էջ՝ <https://www.facebook.com/Ecolurorg-181097155276008/?ref=bookmarks>

ԷԿՈԼՈՒՐ՝ ԲՆՈՒԹՅԱՆ ՀԵՏ ԱՆԴՆԱԾԱԿ

2.1. Մայիսյան համայնք

ՀԱԷԿ-ը գտնվում է Մայիսյան համայնքի վարչական տարածքում: Համայնքը հիմնադրվել է 1932 թվականին: Համայնքի մակերեսը 1989 հա է, որից գյուղատնտեսական նշանակության հողերը՝ 1275,9 հա: Բնակչությունը հիմնականում զբաղվում է այգեգործությամբ, բանջարաբուստանային կուլտուրաների մշակմամբ և անասնապահությամբ:

Մայիսյանն ունի 2030 բնակիչ, որից 15-ն են աշխատում ՀԱԷԿ-ում: Ջեռուցման նպատակով օգտագործում են գազ, փայտ և աթար, երբեմն՝ էլեկտրաէներգիա: Ըստ հարցումների՝ գազի, էլեկտրաէներգիայի համար ձմռանը յուրաքանչյուր տնտեսություն վճարում է 25.000-30.000 դրամ, փայտ էլ սեզոնին օգտագործում են 5-7 խմ ծավալով:

Մայիսյան համայնքը, որի վարչական տարածքում է գտնվում ատոմակայանը, չունի արտակարգ իրավիճակներում պատսպարվելու համապատասխան կահավորմամբ ապաստարաններ: Բնակիչները կարծում են, որ արտակարգ իրավիճակների դեպքում պետք է թաքնվեն նկուղներում:



Նկ. 1 «Նկուղ-ապաստարան» Մայիսյանում

Համայնքում առկա է բժշկական ամբուլատորիա: «Ոչինչ չունենք, ոչ հակազագեր, ոչ այլ պաշտպանիչ միջոցներ, միայն յոդ են տալիս», - ասաց համայնքապետը:

Բնակչության համար միջուկային անվտանգության վերաբերյալ ուղղորդող պաստառներ չկան, տեսանելի վայրերում բացակայում են տարահանման պլանները: Բնակիչների համար չեն կազմակերպվում ուսումնավարժական պարապմունքներ կամ միջոցառումներ: Ուսումնավարժական պարապմունքներ անցկացվում են միայն դպրոցում, եզակի դեպքերում՝ նաև համայնքապետարանին կից գործող արձագանքող վթարային խմբերի անձնակազմի համար: Հարցումներից պարզ դարձավ, որ բնակչության հիմնական մասն իրազեկված չէ միջուկային և ռադիացիոն վտանգի, դրա հետևանքների և իր անհատական պաշտպանական գործողությունների մասին: ԷկոԼուրի հարցին, թե ինչ կանեն, եթե ՀԱԵԿ-ից ստացվի ռադիացիոն վտանգի ազդարարում, գրեթե բոլորը պատասխանեցին. «Անմիջապես տներից դուրս կվազենք դեպի գյուղապետարան»: Համայնքում չեն իրականացվում բնակիչների առողջությանն ուղղված՝ գյուղատնտեսական մթերքների որակի, հողի, օդի, ջրի աղտոտվածության հետազոտություններ: Անդրադառնալով միջուկային անվտանգության ապահովմանը՝ միտված իրավական ակտերի քննարկումներին Մայիսյան համայնքի մասնակցությանը՝ համայնքապետը հայտնեց, որ քննարկումներին համայնքապետարանը պասիվ մասնակցություն է ունենում:

2.2. Արշալույս համայնք

Արշալույսը ՀԱԵԿ-ին ամենամոտ գտնվող համայնքներից է՝ ընդամենը 4 կմ հեռավորություն: Համայնքը տեղակայված է ծովի մակերևույթից 860 մ բարձրության վրա: Կլիման չոր, խիստ ցամաքային է: Բնակչությունը՝ 3900 մարդ, զբաղվում է այգեգործությամբ, բանջարաբուծությամբ: Տարածքում զարգացած է խաղողագործությունը:

Կատարված հետազոտության արդյունքում պարզվեց, որ համայնքն արտակարգ իրավիճակների դեպքում ապահովված չէ հատուկ ապաստարաններով և պաշտպանիչ միջոցներով: Ճառագայթային անվտանգության մասին գիտելիքներ ստանում են միայն դպրոցականները՝ «Ռազմագիտություն» առարկայի դասավանդման ժամանակ: «Դպրոցում որպես ապաստարան նախատեսված է մարզադահլիճը:



Նկ. 2 Արշալույս գյուղի դպրոցի մարզադահլիճը

Սակայն, ինչպես ցանկացած դպրոցի մարզադահլիճ, այն չի կարող ապաստարանի դեր կատարել, նախևառաջ մեծ պատուհանների առկայության պատճառով: Ինչպես հայտնի է, միջուկային վթարների համար նախատեսված ապաստարանները պետք է լինեն ոչ ապակեպատ: Բոլոր հարկերի միջանցքներում փակցված է տարահանման պլանը, ռազմագիտության դասարանում՝ միջուկային վթարի դեպքում պաշտպանվելու պատահառ: «Անվտանգության հետ կապված երաշխիքները պետք է կառավարության մակարդակով տրվեն և այն մարդկանց կողմից, որոնք պատասխանատու են և ապահովում են ատոմակայանի անվտանգ աշխատանքը: Լավ կլիներ, որ մենք ոչ թե սեփական պատկերացումներով հավատայինք, որ անվտանգ է, այլ համոզվեինք, առնչություն ունենայինք փաստաթղթերին, - ասաց ռազմագիտության ուսուցիչը և հավելեց, - մեզ քննարկումներին չեն հրավիրում, մենք կցանկանայինք մասնակցել, ներկայացնել մեր խնդիրները՝ սկսած անհատական պաշտպանության միջոցներից, որոնցով պետք է յուրաքանչյուրն ապահովված լիներ»: Արշալույսի բնակիչները քիչ են տեղեկացված ՀԱԷԿ-ին առնչվող հարցերին, միջուկային վտանգի իրազեկվածության մասին իրենց գիտելիքները գնահատում են «բավարար»: Ռադիոակտիվ թափոնների գերեզմանոցի կառուցման մասին բնակիչները տեղյակ չեն:

Համայնքի բուժամբուլատորիան ապահովված չէ ռադիացիոն վտանգների դեպքում նախատեսված առաջին անհրաժեշտության դեղամիջոցներով: «Վերջին 10 տարվա ընթացքում ոչինչ չեն տվել: 10 տարի առաջ գոնե յոդ էին տալիս, հիմա ընդհանրապես ոչինչ չկա ... ՀԱԷԿ-ի անվտանգության հետ կապված որևէ քննարկման չենք մասնակցել, մեզ ոչ մի տեղ քննարկման չեն հրավիրում: Ինչ-որ չափով

տեղեկացված ենք, համայնքապետարանում ժողովների ժամանակ նկարագրել են, թե ինչպես են տարահանելու բնակչությանը: Ասել են՝ պետք է նկուղներում թաքնվեք, առանց պատուհանների նկուղներում չթաքնվեք: Անգամ ասել են՝ որոնք են լավ նկուղները, որ այդտեղ գնանք, թաքնվենք», - ասացին տեղացիները:

Արշալույսցիների հիմնական զբաղմունքը գյուղատնտեսությունն է: «Ոռոգման սեզոնին Սևջուր գետից ենք օգտվում, բայց գետում ջուր չկա: Ընդամենը 1 հոր ունենք, որը չի բավարարում ամբողջ համայնքին ... Ջուրն է մեր խնդիրը, ջրի դեֆիցիտն ազդում է մեր եկամտի վրա», - ասացին բնակիչները:

Ջեռուցման նպատակով օգտագործում են գազ, էլեկտրաէներգիա, փայտ և աթար: «Գազը թանկ է, հոսանքը թանկ է, փայտն այս տարի թանկացավ ... Ատոմակայանն անմիջապես մեր կողքին է, կցանկանայինք, որ գոնե էլեկտրաէներգիան մեզ համար էժան հաշվեն», - նշեցին Արշալույսի բնակիչները:

Ձմռանը գազի օգտագործման համար յուրաքանչյուր տնտեսություն ամսական միջինը վճարում է 10.000-25.000 դրամ, նույնը՝ հոսանքը: Փայտ օգտագործում են 5-7 խմ: Բնակիչների խոսքով՝ 1 խմ-ը գնում են 25.000-27.000 դրամով:

Արշալույսի բնակիչները մտահոգված են իրենց համայնքում արատներով ծնունդների կապակցությամբ. «20-ից ավելի դեպք գիտենք, երբ երեխաները ծնվել են բնական արատներով: Մեզ մոտ ոչ մի հետազոտություն չի անցկացվել՝ դրա պատճառները պարզելու համար: Բայց մենք մտահոգ ենք, որ դա կարող է կապված լինել ատոմակայանի հետ»:

Արշալույսում միջուկային անվտանգության պատասխանատուն դպրոցում տնօրենն է, համայնքում՝ համայնքապետը:

2.3. Մեծամոր քաղաք

Մեծամոր քաղաքը գտնվում է ՀԱԷԿ-ից 6 կմ հեռավորության վրա: Հիմնադրվել է 1969թ-ին՝ որպես ՀԱԷԿ-ի բնակելի ավան, քաղաք՝ 1995թ-ից), գտնվում է Երևան քաղաքից 38 կմ հեռավորության վրա: Բնակչության թիվը կազմել է 9 հազար մարդ /ըստ մարզպետարանի պաշտոնական կայքի՝ 12165/:

Բնակչության կազմը՝ հայեր, ռուսներ, եզդիներ, ասորիներ: Տնային տնտեսությունների թիվը՝ 2700: Ունի դպրոց, մշակույթի տուն, երաժշտական դպրոց: Հողային ֆոնդի մոտ 95%-ն օգտագործվում է որպես համայնքի հողեր, որի մոտ 14%-ը տնամերձ հողերն են: Դրանք բանջարանոցներ և պտղատու, խաղողի այգիներ են: Համայնքի մակերեսը 912 հա է:



Նկ.3 ք. Մեծամորի դպրոց

Մեծամոր քաղաքում բնակչության զգալի մասն աշխատում է ՀԱԷԿ-ում: Համայնքն ունի պոլիկլինիկա և հիվանդանոց: Կա խնդիր խմելու ջրի հետ կապված: Ոռոգման ջուր էլ բավարար քանակությամբ չունեն, համայնքի 600 հեկտար գյուղատնտեսական նշանակության հողն անջրդի է: Համայնքում կա կոյուղաջրերի հեռացման կենտրոնացված համակարգ, բայց չկան մաքրման կայաններ: Բնակիչների խոսքով, հաճախ տարածվում է գարշահոտություն: Ջեռուցման նպատակով Մեծամորում օգտագործում են էլեկտրաէներգիա, գազ և փայտ: Եթե բնակիչները ձմռանը ջեռուցումն իրականացնում են գազով և էլեկտրական հոսանքով, ապա ամսական 60.000-80.000 դրամի գումար են վճարում, իսկ փայտի ձեռքբերման համար, 100.000-250.000 դրամ:

Քաղաքում վթարային իրավիճակների համար նախատեսված բնակչության տարահանման պլան տեսանելի վայրերում չկա: Միջուկային անվտանգության վերաբերյալ ուղղորդող պաստառներ, ցուցանակներ ևս առկա չեն: Մեծամորում անցկացված հարցումներից պարզվեց, որ բնակիչները բավարար իրազեկված չեն ՀԱԷԿ-ի անվտանգության ապահովմանն ուղղված միջոցառումների մասին: Հարցվածները նշեցին, որ Մեծամորում պարբերաբար իրականացվում են անվտանգության ուսումնավարժական պարապմունքներ, սակայն միջուկային անվտանգության վերաբերյալ իրավական ակտերի քննարկումներ համայնքում չեն անցկացվել:

Մեծամորում բնակչության միջուկային անվտանգության պատասխանատուն համայնքի ղեկավարն է:

2.4. Ակնալիճ համայնք

Ակնալիճ համայնքը գտնվում է ՀԱԷԿ-ից 5 կմ հեռավորության վրա:

Գյուղը տեղակայված է Արարատյան դաշտի կենտրոնական մասում, Արմավիրի մարզի Էջմիածնի շրջանի հյուսիս-արևմուտքում: Տարածությունը 1740 հա է, հյուսիսից և հյուսիս-արևմուտքից սահմանակից է Ֆերիկ և Արշալույս, հարավից և հարավ-արևելքից Տարոնիկ և Մայիսյան համայնքներին: Գտնվում է 7-9 բալանոց սեյսմիկ շրջանում:

Ակնալճի տարածքում՝ ծովի մակերևույթից 860 մ բարձրության վրա, գտնվում է Այդր լիճը, որը սնվում է ստորերկրյա ջրերից և աղբյուրներից:



Նկ.4. Գյուղ Ակնալիճ

Ակնալճի 3500 բնակչից միայն 40-ն են աշխատում ՀԱԷԿ-ում հիմնականում որպես բանվոր: Բնակիչների եկամուտները ձևավորվում են այգեգործությունից, բանջարաբուստանային կուլտուրաների մշակումից և անասնապահությունից:

Ակնալիճում կա 13 խորքային հոր, որոնցից մեկն օգտագործվում է խմելու, իսկ մյուսները՝ ոռոգման նպատակով: Ոռոգման ջուրը չի բավարարում գյուղի բոլոր մշակովի հողատարածքները ոռոգելու համար: Ակնալճի բնակիչները պաշտպանված չեն ՀԱԷԿ-ի պոտենցիալ ռիսկերից: Համայնքում չկան ապաստարաններ, հատուկ հակաճառագայթային թաքստոց, պաշտպանիչ տեխնիկական միջոցներ, առաջին բուժօգնության անհրաժեշտ պարագաներ ճառագայթային ահազանգերի համար: Գյուղմթերքի անալիզներ չեն անցկացվում:

Ռադիացիոն վտանգի դեպքում բնակիչները պետք է թաքնվեն դպրոցի, մշակույթի տան նկուղներում, որոնք տեխնիկապես կահավորված չեն, իրենցից ներկայացնում են փոքրիկ և խոնավ տարածքներ: Բնակչության ճառագայթային անվտանգության

վերաբերյալ ուղղորդող պաստառներ համայնքում չկան: Ճառագայթային վտանգի դեպքում տարահանման պլանը բնակիչներին հասանելի վայրերում առկա չէ: Հասանելի է դպրոցի տարահանման պլանը: Տարածաշրջանում ռադիոակտիվ թափոնների գերեզմանոցի կառուցման մասին բնակիչները տեղյակ չեն:

Ջեռուցումը բնակիչների համար մեծ ծախս է: Էլեկտրաէներգիայով գրեթե չեն ջեռուցում տները, հիմնականում տաքանում են գազով և փայտով: Գազի սակագինը ստացված եկամուտների համեմատ բարձր է, փայտն էլ տարեցտարի թանկանում է: Գազի համար ձեռմանը ամսական վճարում են 20.000, 50.000 և անգամ 80.000 դրամ: Եթե ջեռուցումը փայտով է, սեզոնին անհրաժեշտ է 10-12 խմ:

2.5. Արտաշար համայնք

Արտաշարը ՀԱԷԿ-ից գտնվում է 6-7 կմ հեռավորության վրա, տեղակայված է Միջինարաքսյան հարթավայրում: Համայնքի բնակիչներից ՀԱԷԿ-ում աշխատող չկա: Ունի միջնակարգ դպրոց, բուժօգնության կետ: Գյուղատնտեսական հողահանդակները ռոտզվում են Արմավիրի Մայր ջրանցքի և Սև ջուր գետի ջրերով: Ոռոգման համակարգը սպասարկում է «Արմավիր» ՋՕԸ-ն: Պետական և քաղաքացիների սեփականություն հանդիսացող գյուղատնտեսական հողահանդակներն օգտագործվում են որպես վարելահողեր:

Կան քիչ տարածությամբ արոտավայրեր և պտղատու այգիներ: Համայնքի մակերեսը կազմում է 7.3 ք/կմ: Բնակչության թիվը՝ 1196, բնակչության կազմը՝ հայ, եզդի, տնային տնտեսությունների թիվը՝ 184: Բնակչության հիմնական զբաղմունքը գյուղատնտեսությունն է: Համայնքի գյուղատնտեսական նշանակության հողատեսքերի ընդհանուր մակերեսը 528,39 հա է, որից վարելահողեր՝ 354-հա, այլ հողատեսքեր՝ 144,39 հա, ջրանցքներ՝ 30,0 հա: Վերջին 10-15 տարիներին Արարատյան ավազանի ստորերկրյա ջրերի ձկնաբուծության նպատակով անխնա և անսահմանափակ օգտագործման հետևանքով համայնքում առաջացել է սակավաջրություն, իջել են խորքային հորերի մակարդակները, ամբողջովին ցամաքել է Սև ջուր գետը, որը համայնքն ապահովում էր ոռոգման ջրով: Մեծամոր, Արմավիր քաղաքների կոյուղաջրերը հոսում են համայնքի ոռոգման համակարգ, և այդ ջրերով ոռոգված մշակովի հողատարածքներից ստացվող բերքը շուկայում դարձել է անմրցունակ:


Գյուղատնտեսությունը հաճախակի տուժում է ուշ գարնան ցրտահարությունից, մայիս-հունիս ամիսներին տեղացող կարկուտից: Համայնքում չկան հատուկ ապաստարաններ: «Հիմնական ապաստարան չունենք: Մեր տարահանման պլաններով արտակարգ իրավիճակների դեպքում որպես ապաստարան ընտրված են բնակելի տների նկուղները, դպրոցի նկուղը», - ասացին բնակիչները: Սակայն կատարված

ուսումնասիրությամբ պարզվեց, որ որևէ նկուղ չի համապատասխանում իր ֆունկցիոնալ նշանակությանը:

Չկա նաև ահագանգերի ընդունման համապատասխան կայան: Համայնքապետը նշեց. «Հաղորդման կայանը Մեծամորում է, այս տարի խորհրդակցության ժամանակ բարձրացրել ենք հարցը, 100 տոկոս կլուծվի»:

Դեղամիջոցներ, որոնք միջուկային վտանգների դեպքում կարող են օգտագործվել առաջին օգնության համար, համայնքի բուժկետին չեն հատկացվում:

Միջուկային անվտանգության վերաբերյալ ուղղորդող պաստառներ ևս չկան: Տարահանման պլանն առկա է գյուղապետարանի չիրկիզվող պահարանում: Հասանելի են դպրոցի տարահանման պլանները, դրանք փակցված են միջանցքներում:



Նկ .5 Տարահանման պլանն Արտաշարի միջնակարգ դպրոցի պատին

Ուսումնավարժական պարապմունքներ վերջին անգամ անցկացվել են 2017 թ-ին: Համայնքապետը և բնակիչները նշեցին, որ ՀԱԵԿ-ի հետ կապված իրավական ակտերի քննարկումներին չեն մասնակցել:

Միջուկային վտանգի իրազեկվածության մասին իր գիտելիքները համայնքապետը գնահատեց «միջին», իսկ բնակիչներ՝ հիմնականում «բավարար»:

Համայնքի տնտեսությունների 70 տոկոսը ջեռուցման նպատակով օգտագործում է փայտ: Փայտն էլ տարեցտարի թանկանում է, 1 խմ-ն ձեռք են բերում 30.000 դրամով: Ձմռանն օգտագործում են 6-10 խմ:

Համայնքապետը նշեց, որ 2018 թվականին սննդի տեսչությունն անալիզի համար վերցրել է բանջարանոցային կուլտուրաների նմուշներ, սակայն արդյունքների մասին իրենց պաշտոնապես չեն հայտնել:

2.6. Մրգաշատ

Գտնվում է ՀԱԷԿ-ից 6 կմ, մարզկենտրոնից՝ 4 կմ, Երևանից՝ 42 կմ հեռավորության վրա: Տեղակայված է Միջինարաքայան հարթավայրում: Գյուղատնտեսական հողահանդակները ոռոգվում են Արմավիրի Մայր ջրանցքի ջրերով: Գյուղատնտեսական հողահանդակներում մեծ բաժին ունեն վարելահողերը, պտղատու և խաղողի այգիները: Համայնքի հիմնախնդիրների մեջ գլխավորը ոռոգման ջրի հարցն է և ոռոգման, խմելու ջրի ջրագծերի, գյուղամիջյան ճանապարհների վերանորոգումը, դպրոցաշինության հարցը: Վարչական տարածքը՝ 1786 հա է, բնակչության թիվը՝ 6600 մարդ՝ բազմազգ: Տնային տնտեսությունների թիվը՝ 1944: Ունի 2 միջնակարգ դպրոց, մանկապարտեզ, մշակույթի տուն, երաժշտական դպրոց:

Մրգաշատի բնակիչներից 25-ն աշխատում են ՀԱԷԿ-ում: Ըստ համայնքապետի՝ ՀԱԷԿ-ի ազդեցության վերաբերյալ համայնքում ուսումնասիրություններ չեն անցկացվել, անվտանգության ռիսկերի մասին տեղեկատվություն չունեն: «Մի ամիս առաջ Երևանից եկան մի երկու հոգի, ասացին՝ ուզում ենք սարքավորում դնել, նայենք՝ ատոմակայանի ճառագայթումն ինչքան է, բարձրանում է, թե՛ ոչ: Հարցրեցին՝ տեղ կտա՞ք, ասացի՝ որտեղ հարմար է ձեզ, այդտեղ էլ դրեք: Գնացին, էլ չեն եկել: Գնացանք մեզ՝ ճառագայթման վտանգի դեպքում պատսպարվելու ենք բնակիչների, հիվանդանոցի, մանկապարտեզի մշակույթի տան նկուղներում, բայց դրանք ոչ մի բանով հագեցված չեն, միայն մշակույթի տան նկուղում սեղան, աթոռներ կան դրված: Հակագազ էլ չունենք, դեղամիջոց, սնունդ»:

Բնակչության միջուկային անվտանգության վերաբերյալ ուղղորդող պաստառներ համայնքում չկան: Ռադիոակտիվ թափոնների գերեզմանոցի կառուցման մասին բնակիչներն իրազեկված չեն:

Միջուկային վտանգի դեպքում բնակչության տարահանման պլանը գտնվում էր համայնքապետարանի շենքում, փողոցների ցուցափեղկերում առկա չէ: Հարցին, թե ինչու տեսանելի վայրերում այդ պաստառները չկան, համայնքապետը պատասխանեց. «Սեյֆում է, կպնեն պատին, գյուղի կեսը կթողնի, կգնա»: Արտակարգ իրավիճակների դեպքում աշակերտների տարահանման պլան կար գյուղի միջնակարգ դպրոցում:



Նկ.6 Ճառագայթային տազնապի դեպքում որպես ապաստարան նախատեսված Մրգաշատ գյուղի N 1 միջնակարգ դպրոցի սպորտ դահլիճի տեսքը

Համայնքապետի խոսքով՝ ՀԱԷԿ-ի ազդեցության գոտում գտնվող և գազաֆիկացված Մրգաշատի բնակչության 70 տոկոսը ձմռանը տաքանում է փայտով, որն այս տարի թանկացել է, և 1 խմ-ն արժե 32.000 դրամ: Գազից կարողանում է օգտվել բնակչության միայն 25 տոկոսը: Անցկացված հարցումները ցույց տվեցին, որ ընտանիքները ձմռանն էլեկտրաէներգիայի համար ամսական վճարում են 10.000-25.000 դրամ, օգտագործում են 5-10 խմ փայտ:

2.7. Տարոնիկ համայնք

Տարոնիկը գտնվում է ՀԱԷԿ-ից 6-7 կմ հեռավորության վրա՝ մարզի հյուսիս – արևելյան մասում, ծովի մակերևույթից 845մ բարձրության վրա: Համայնքը գտնվում է մերձարաքսյան գոտում, մարզկենտրոնից 15 կմ հեռավորության վրա: Գյուղի կլիման ձմռանը ցուրտ է, ամռանը՝ շոգ, հաճախ դիտվում է երաշտ և ցրտահարություն²: Բնակչության թիվը՝ 2278 մարդ, տնային տնտեսությունների թիվը՝ 443: Բնակչության հիմնական զբաղմունքը գյուղատնտեսությունն է: Ունի միջնակարգ դպրոց, ակումբ, գրադարան, բուժապասարկման կետ: Տարոնիկ համայնքի վարչական տարածքը կազմում է 1050,47 հա, որից գյուղատնտեսական նշանակության հողերը՝

² <http://armavir.mtad.am/VTSS/>:

812,96 հա, որից քաղաքացիների սեփականության հողերը՝ 547,93 հա, համայնքային սեփականության հողերը՝ 139,0 հա, չմշակվող հողերը՝ 55 հա, որի պատճառը ոռոգման խնդիրն է: Արոտավայրերը զբաղեցնում են 41 հա:

Տարոնիկ համայնքում կենցաղային նպատակներով ջրհորներից օգտվել հնարավոր է, բայց խմելու համար ջուրը կա՛մ հարևան գյուղերից են բերում, կա՛մ գնում:

Համայնքի տնտեսության զարգացման ճյուղը գյուղատնտեսությունն է: Համայնքի հողերի հիմնական մասն օգտագործվում է որպես վարելահող՝ զբաղեցնելով մոտ 231հա:



Նկ. 7 Գյուղ Տարոնիկ

Տարոնիկ համայնքի վարչական տարածքում են գտնվում ՀԱԷԿ-ի «Սև ջուր» ու «Փռուղ» պոմպակայանները, համայնքի տարածքով է անցնում ՀԱԷԿ-ին ջուր մատակարարող 14 կմ երկարությամբ խողովակաշարը, Փռուղ ջրամբարը, որոնք զբաղեցնում են ընդհանուր շուրջ 36 հա տարածք: «Համայնքում գտնվող ՀԱԷԿ-ի շինությունների հարցը իրավաբանորեն կարգավորված չէ: Եթե կարգավորված լինեք, խոշոր հարկ պետք է վճարեք ՀԱԷԿ-ը Տարոնիկում զբաղեցրած տարածքների համար: Որպես փոխհատուցում պարտավորություն է ունեցել համայնքին խմելու ջրով

ապահովել: Սակայն այդ պարտավորությունն իրականացրել է 2005-2006 թթ.: Երբ ջրի հորիզոններն իջել են, այլևս չի ապահովել խմելու ջրով»,- հանդիպման ժամանակ «ԷկոԼուր»-ի թիմին հայտնեց համայնքի ղեկավար Արմեն Խլդարյանը³:



Նկ.8 Տարոնիկ համայնք արտահոսվող կեղտաջրերը

Տարոնիկ համայնքի բնակիչները ճառագայթային վտանգի դեպքում հնարավորություն չունեն պատսպարվելու: ՀԱԷԿ-ի ազդակիր գոտում գտնվող համայնքում առկա չեն նման դեպքերի համար նախատեսված թաքստոցներ: Որպես ապաստարաններ կարող են ծառայել բնակիչների նկուղները, բայց դրանք ոչ բոլորն ունեն: Իսկ առկա նկուղների մակերեսը բավարար չէ համայնքի 2200-ից ավելի բնակչությանը պատսպարելու համար: Այս մասին ԷկոԼուրին հայտնեցին Տարոնիկի բնակիչները: Համայնքում միջուկային անվտանգության վերաբերյալ ուղղորդող պատասառներ չկան, իսկ միջուկային վտանգի դեպքում բնակչության տարահանման պլանը հասանելի չէ բնակիչների համար: Այն առկա է համայնքապետարանում: ԷկոԼուրին համայնքապետարանից հայտնեցին, որ ԱԻՆ-ի կողմից տրվել է բնակչության տարահանման առաջնահերթության պլան, թե ուր պետք է տարահանել բնակչությանը և

³ <https://www.ecolur.org/hy/news/nuclear-energy/---/11386/>

ինչ տրանսպորտային միջոցներով: Համայնքապետարանից ասացին, որ տարհանող մեքենաներն ամրագրված են, գյուղի բեռնատարները՝ հաշվառված:

Տարոնիկ համայնքն ապահովված չէ ճառագայթային վտանգի դեպքում անհրաժեշտ առաջնային օգտագործման պարագաներով՝ չկան դիմակներ, հակազագեր: Համայնքում գործում է բուժկետ, բայց անհրաժեշտ դեղորայքային պարագաները բացակայում են: Համայնքապետարանն իր հերթին երբևէ չի դիմել պատկան մարմիններին բացակայող պարագաների տրամադրման պահանջով: Մինչդեռ այն ամեն տարի մարզպետարանին պետք է ներակայացնի համայնքին անհրաժեշտ պարագաների հայտը:

Այս համայնքում երբևէ ՀԱԷԿ-ի միջուկային անվտանգության ապահովմանը միտված իրավական ակտերի քննարկումներ չեն կազմակերպվել: ԱԻՆ-ը անվտանգության ուսումնավարժական պարապմունքներ վերջին անգամ անց է կացրել 2017 թ.:

«Անվտանգության գործողություններին են ծանոթացրել, օրինակ՝ ազդակի դեպքում ինչ պետք է անի ժողովուրդը», - նշեց համայնքապետարանի աշխատակիցը: Այս միջոցառումներին բնակիչների մասնակցության ապահովումն իրականացվել է բանավոր՝ հեռախոսով տեղեկացնելու միջոցով: ՀԱԷԿ-ն այս համայնքում երբևէ ճառագայթային մշտադիտարկումներ չի իրականացրել, ստորերկրյա խմելու ջրերի ռադիացիոն մակարդակի ստուգում՝ նույնպես:

2.8. Առատաշեն համայնք

Գտնվում է ՀԱԷԿ-ից ուղիղ գծով 10 կմ հեռավորության վրա, մարզի արևելյան մասում: Հեռավորությունը մայրաքաղաքից՝ 25 կմ, մարզկենտրոնից՝ 24 կմ: Կլիման ձմռանը ցուրտ է, ամռանը՝ շոգ: Հաճախ դիտվում է երաշտ և ցրտահարություն: Համայնքի մակերեսը 975 հա է: Չի ոռոգվում 50 հեկտարը: Բնակչության թիվը՝ 2820 մարդ, բնակչության կազմը՝ հայեր /94%/, եզդիներ /5.8%/, ռուսներ, ուկրաինացիներ, ասորիներ /0.2%/, տնային տնտեսությունների թիվը՝ 541: Ունի միջնակարգ դպրոց, նախակրթարան, մանկապարտեզ, կուլտուրայի տուն, բուժամբուլատորիա: Համայնքն ունի խմելու և ոռոգման ջրի խնդիր⁴:

«Մենք առաջին զոնայի բնակիչներ ենք, բայց չունենք հատուկ ճառագայթային ապաստարաններ: Արտակարգ իրավիճակների դեպքում նկուղներն են նախատեսված: Իրազեկման պաստառներ համայնքում չկան: Այնպիսի տպավորություն է, որ 100 տոկոսով անվտանգ է և կարիք չկա մեզ որևէ բան ասելու: Ատոմակայանը՝ ինքը, պետք է կազմակերպի, մասնագետներ բերի, դպրոցներից, մանկապարտեզներից սկսած իրազեկի: Բա մարդկանց տարրական գիտելիքներ չտա՞ն: Մեր տարածաշրջանից

⁴ <http://armavir.mtad.am/files/docs/24269.pdf>

շատերը քաղցկեղով հիվանդ են, մարդը մտածում է, որ կարող է դրանից էլ լինի: Ինչո՞ւ այդ մասին չեն խոսում, որ ՀԱԷԿ-ը մեզ արտոնություններ չտա՞: Եթե այդպես է, թող մեզ տանեն՝ այլ գոտում ապրենք, մեզ ու մեր երեխաներին վտանգի չենթարկենք: Ոչ միայն բնակչությանը, նաև տեղական իշխանությանն են անտեսել: Այս գոնայի տեղական իշխանության ներկայացուցիչների հետ մոտեցումն այլ պետք է լիներ», - ասաց Առատաշենի համայնքապետը⁵:

Համայնքից խնդրել են ռադիացիոն ֆոնի մոնիտորինգի համար նախատեսված համակարգի տեղ հասկացնել, սակայն դրան որևէ քայլ չի հետևել: Դպրոցի միջանցքների պատերին ցուցադրված էին տարահանման պլանները: Ըստ դպրոցի ներկայացուցիչի՝ միջուկային վտանգների դեպքում միայն տարահանման պլանները բավարար չեն. «Ամենակարևոր հարցը բունկերների՝ հատուկ թաքստոցների հարցն է, որոնք պետք է լինեն համայնքի դպրոցում, մշակույթի տանը և մանկապարտեզում: Սակայն այդպիսիք չկան»: Առողջապահական հաստատություններից համայնքն ունի բուժամբուլատորիա, որն ապահովված է միայն յոդով: Առաջին անհրաժեշտության պաշտպանիչ միջոցների ձեռքբերման համար համայնքապետարանի կողմից հայտ երբևէ չի ներկայացվել:

Անվտանգության ազդանշանների տեղադրման համար ծախսերը ՀԱԷԿ-ը չի հոգում, այլ թողնում է համայնքի վրա: ՀԱԷԿ-ի միջուկային անվտանգության ապահովմանը միտված իրավական ակտերի քննարկումներին համայնքը չի մասնակցում: Ուսումնավարժական պարապմունքներ վերջին անգամ անցկացվել են 2017 թ-ին: Միջուկային վտանգի իրազեկվածության մասին իրենց գիտելիքները համայնքապետարանի աշխատակիցները, հարցված բնակիչները գնահատեցին «անբավարար»: Համայնքապետի խոսքով՝ ջեռուցման նպատակով բնակչությունը հիմնականում օգտվում է գազից և էլեկտրաէներգիայից: Փայտով ջեռուցվում է տնային տնտեսությունների 10 տոկոսը:

Գազի համար ամսական վճարը միջինում կազմում է 50.000 դրամ, հոսանքի համար՝ 10.000-30.000 դրամ, փայտ՝ միջինը 5 խմ:

2.9. գ. Եղեգնուտ

Եղեգնուտ համայնքը գտվում ՀԱԷԿ-ից 8-9 կմ հեռավորության վրա՝ Արմավիրի մարզի հարավ - արևելյան մասում, ծովի մակարդակից 845 մ բարձրության վրա: Ունի 475 տնտեսություն, 2172 մշտապես ներկա բնակչություն, որից 75%-ը՝ հայեր, 24%-ը՝ եզդիներ, 1%-ը՝ ասորիներ և ռուսներ: Համայնքի վարչական տարածքը կազմում է 2160,56 հա, որից 1250 հա-ը՝ վարելահող: Շուրջ 5 տարի է՝ համայնքի հողերը ոռոգվում

⁵ <https://www.ecolor.org/hy/news/nuclear-energy/---/10981/>

են 100%-ոց կոյուղաջրերով, որի պատճառով հիվանդանում են բույսերը, կենդանիները և մարդիկ:

Համայնքում չկան հակաճառագայթային թաքստոցներ: Չկան միջուկային վտանգների դեպքում ուղղորդող պաստառներ, միջուկային անվտանգության պլան: Համայնքի բուժկետը, դպրոցն ապահովված չեն ճառագայթային վտանգների դեպքում անհրաժեշտ պաշտպանիչ միջոցներով: Պատասպարվելու միակ վայրը նախատեսված նկուղներն են, որոնք տեխնիկապես կահավորված չեն և չեն կարող ապահովել բնակիչների անվտանգությունը ճառագայթային վտանգներից:

Հարցված բնակիչների 97 %-ը նշել է, որ ՀԱԷԿ-ի միջուկային անվտանգության ապահովմանը միտված իրավական ակտերի քննարկումների մասին իրենց չեն իրազեկում, երբեք չեն մասնակցել դրանց քննարկումներին: Իսկ միջուկային վտանգի իրազեկվածության մասին իրենց գիտելիքները հիմնականում գնահատել են «բավարար»:

Ոռոգման սեզոնին համայնքը ջրի սակավության խնդիր ունի: Ըստ համայնքապետի՝ Սևջուր գետում ջուր չկա, Սևանից բաց թողնվող ջուրը համայնք չի հասնում: Հողերը ոռոգում են կա՛մ Ախուրյանի ջրամբարից եկող ջրով, կա՛մ խորքային հորերի ջրով: Ունեն 17 խորքային հոր, սակայն ջուրը չի բավականացնում: Նոր խորքային հորերի անհրաժեշտություն կա:

«Որ ջուր չի լինում, ԶՕԸ-ն Զարթոնքի կայանից նաստսով կոյուղաջրերն է մղում», - ասաց համայնքապետը:



Նկ.8 Արմավիր և Մեծամոր քաղաքների կոյուղաջրերը՝ որպես տարածաշրջանի մի քանի համայնքի գյուղատնտեսական հողերի ոռոգման միջոց

Բնակիչները ջեռուցման նպատակով հիմնականում օգտագործում են գազ և փայտ: Տարվա ընթացքում օգտագործված գազի դիմաց վճարը մեկ տնտեսության համար միջինը կազմում է 25.000-45.000 դրամ: Փայտ կարող են օգտագործել մինչև 15 խմ: Այս տարի 1 խմ-ը գնել են 25.000 դրամով: Էլեկտրաէներգիայից օգտվում են կենցաղային նպատակներով, ամսական վճարում են 10.000-20.000 դրամ:

2.10. գ. Զարթոնք

Զարթոնք գյուղը գտնվում է ՀԱԷԿ-ից ուղիղ գծով 9 կմ հեռավորության վրա՝ մարզի հարավ-արևելյան մասում, ծովի մակերևույթից 845,5մ բարձրության վրա, կիսաանապատային գոտի է, գտնվում է Մերձարաքսյան գոտում: Համայնքը մարզկենտրոնից հեռու է 12 կմ, մայրաքաղաքից՝ 45կմ: Գյուղի կլիման ձմռանը ցուրտ է, ամռանը՝ շոգ, հաճախ դիտվում է երաշտ և ցրտահարություն: Վարչական տարածքը կազմում է 1621,26 հա: Համայնքն ունի 2655 բնակիչ, որից 60 %-ը հայեր են, 40%-ը՝ եզդիներ: Գյուղատնտեսական նշանակության հողերի մակերեսը կազմում է 419,8 հա: Համայնքում գործում է 2 ձկնային տնտեսություն՝ «Վանա Տառեխ» ՓԲԸ-ի և «Արմավիր ֆերմեր» ՍՊԸ-ի ձկնաբուծարանները:

Զարթոնքում չկան ապաստարաններ, բնակիչներն ապահովված չեն ռադիացիոն վտանգների դեպքում անհրաժեշտ պաշտպանիչ միջոցներով: «Մի 4 տարի առաջ մարզպետարանում սեմինար անցկացվեց: Մեր բժշկական ամբուլատորիային, որը սպասարկում է 3 համայնք, հատկացվեց յոդ և յոդացված աղ⁶», - ասաց համայնքապետը:



Նկ.9 ՀԱԷԿ-ը Զարթոնք գյուղից

Համայնքում բնակչությանը միջուկային անվտանգության վերաբերյալ ուղղորդող պատասխաններ չկան: Միջուկային վտանգի դեպքում բնակչության տարահանման պլանն

⁶ <https://www.ecolur.org/hy/news/water/--/6036>

առկա է գյուղապետարանում, սակայն ցուցադրված չէր տեսանելի վայրում: Համայնքի տարածքում այն որևէ տեղ փակցված չէ: Ուսումնավարժական պարապմունքներ բնակիչների համար վերջին անգամ անցկացվել են 2017 թ-ի հուլիսին: Ռադիոակտիվ թափոնների գերեզմանոցի կառուցման մասին բնակիչները տեղյակ չեն:

Զարթոնքի բնակիչների շրջանում անցկացված հարցախույզի վերլուծությունը ցույց է տալիս, որ նրանք (համայնքը) ՀԱԷԿ-ի միջուկային անվտանգության ապահովմանը միտված իրավական ակտերի քննարկումներին չեն մասնակցում, սակայն միջուկային վտանգի իրազեկվածության մասին իրենց գիտելիքները բնակիչները գնահատել են «բավարար»:

Զարթոնքը, հանդիսանալով ՀԱԷԿ-ին ազդակիր համայնք, այնուամենայնիվ, չի ստանում սոցիալական աջակցություն ՀԱԷԿ-ից: Անգամ ջեռուցումը բնակիչներն ապահովում են հիմնականում փայտով ու աթարով: Վառելափայտի 1 խմ-ը գնում են 20.000-25.000 դրամով: Զմռանը օգտագործում են 7-10 խմ վառելափայտ:

2.11. գ. Հովտամեջ

Գյուղը գտնվում է ՀԱԷԿ-ից 9 կմ, մարզկենտրոնից 19 կմ հեռավորության վրա: Հովտամեջը տեղակայված է Միջինարաքսյան հարթավայրում, ծովի մակարդակից ունի 880 մ բարձրություն: Գյուղն ունի 272 առկա տնտեսություն, դպրոց, գրադարան, բուժկետ, կապի հանգույց: Ագրոկլիմայական տեսակետից համայնքն ընկած է բացարձակ ոռոգման գոտում: Ընդհանուր տարածքը կազմում է 270 հա, բնակելի տարածքը՝ 56 հա: Տվյալ համայնքից ՀԱԷԿ-ում աշխատողներ չկան:



Նկ.10 գ. Հովտամեջ

Համայնքի բնակիչները հիմնականում զբաղվում են հողագործությամբ, մշակում են բանջարաբոստային կուլտուրաներ, զբաղվում են անասնապահությամբ՝ չնայած արոտավայրեր չունեն:

Ջեռուցման նպատակով օգտագործենում փայտ, բնական գազ: Կենցաղում օգտագործվող էլեկտրաէներգիայի դիմաց ամսական վարձավճարը կազմում է 5,0-10,0 հազար դրամ: Բնակարանների ջեռուցման նպատակով օգտագործվող վառելափայտի դիմաց տարեկան ծախսը կազմում է 150,0-300,0 հազար դրամ:

Ապաստարաններ չունեն, նախատեսված են նկուղները: Միջուկային վտանգի դեպքում բնակչության տարահանման պլանն առկա է համայնքապետարանում, սակայն բնակչության համար դրանք ցուցադրված և տեսանելի չեն: Ամբուլատորիայում յոդի հաբեր չկան, հակազգագերով, կամ շնչադիմակներով ապահովված չեն: Անվտանգության ազդարարման համակարգը միացված չէ ՀԱԷԿ-ին: Համայնքում վերջին անգամ անվտանգության ուսումնավարժական պարապմունքներ անց են կացվել 12.05.2017թ՝ համայնքապետարանի աշխատակիցների, բուժքույրերի, վարորդների, խոշոր ֆերմերների, դպրոցի ռազմագիտության ուսուցչի մասնակցությամբ:

Ըստ հարցվածների՝ ՀԱԷԿ-ին վերաբերող իրավական ակտերի քննարկմանը չեն մասնակցել երբևէ, անմասն են ոլորտում որոշումների կայացմանը: Երբևէ ռադիակտիվ ֆոնի չափումներ չեն կատարվել: Երեմն կատարվել են հողի, ջրի անալիզներ, սակայն արդյունքների մասին չեն հայտնել:

Ունեն 800մ երկարությամբ խմելու ջրի ասբեստի խողովակ, սակայն այն փոխելու ֆինանսական միջոցներ չունեն, իսկ «Վեոլիա ջուր»-ը հրաժարվում է այն փոխել իր միջոցների հաշվին: Համայնքն ամեն տարի ներկայացնում է անվտանգության միջոցների ձեռքբերման հայտը: Բնակիչները տեղեկացված չեն ատոմակայանի ռիսկերից, չեն տիրապետում ռադիացիոն անվտանգության հետ կապված ինֆորմացիայի, չգիտեն, թե եթե լինեն արտակարգ իրավիճակներ, ինչ հետևանքներ են կրելու: «Մեր նկուղներն ապաստարաններ չեն. դուռ, լուսամուտ, սաղ բաց է, պաշտպանական ոչինչ չկա՝ ոչ հակազգազ, ոչ յոդ, ոչ մի բան, ես մարդկանց ո՞նց տանեմ, ո՞նց պահեմ: Սրանք հարցեր են, որոնց պատասխանները ռեալ ոչ ոք չգիտի, իրավիճակը, հետևանքները ոչ ոք չի պատկերացնում՝ սկսած ինձանից: Այո, մարդիկ չեն պատկերացնում՝ դա ինչ է, գիտենք, որ ո՛չ ջուր է, ո՛չ քամի, ո՛չ փոշի: Մենք կուզենայինք իմանալ՝ ինչը ցանենք, ինչը պետք չէ, թող հողի, ջրի անալիզներ արվեն: Մենք ռիսկ չենք անում ինքներս տանենք, անալիզ անել տանք, մեզանից են փող ուզելու, թիվ են կրակելու», - հանդիպման ժամանակ նշեց Հովտամեջի համայնքապետը:

2.12. ք. Արմավիր

Արմավիր քաղաքը ՀՀ Արմավիրի մարզի վարչական կենտրոնն է: ՀԱԷԿ-ից գտնվում է 10 կմ հեռավորության վրա: Տեղակայված է Արարատյան դաշտում՝ ծովի

մակարդակից 860մ բարձրության վրա: Երևանից գտնվում է 48,0 կմ հեռավորության վրա: Քաղաքն ունի զարգացած արդյունաբերություն: Համայնքի մակերեսը 2181,99 հա է: Բնակչության թիվը՝ 37059 մարդ (հայեր, ռուսներ, քրդեր, եզդիներ, ասորիներ): Տնային տնտեսությունների թիվը՝ 8000: Բնակչության հիմնական զբաղմունքն է՝ սպասարկում, գյուղատնտեսություն, արդյունաբերություն, տրանսպորտ և կապ: Համայնքի 90%-ը զագաֆիկացված է, առանձին թաղամասեր ունեն խմելու ջրի խնդիր: Ունի նախադպրոցական, միջնակարգ, միջին մասնագիտական հաստատություններ, սպորտ դպրոց, մշակույթի տուն, հիվանդանոց: Արդյունաբերության մեջ հատկապես մեծ տեսակարար կշիռ ունեն ագրոարդյունաբերական համալիր ձեռնարկությունները: Կան մի շարք պահածոների, գինու, կոնյակի գործարաններ: Ունի խորդենու վերամշակման գործարան, 1966 թ-ից գործում է կոնյակի գործարանը: Արտադրվում են Վերմուտ տեսակի գինիներ: Ունի նաև կարի արտադրամաս: Ծանր արդյունաբերությունից զարգացած է շինանյութերի արտադրությունը:

Հողային ֆոնդի մոտ 75%-ն օգտագործվում է որպես համայնքի հող, որի կեսը տնամերձ հողերն են: 341,52 հա գյուղատնտեսական նշանակության հող չի մշակվում ռոտզման ջրի բացակայության պատճառով: Դրանք բանջարանոցներ և պտղատու, խաղողի այգիներ են: Զբաղվում են տեխնիկական մշակաբույս հանդիսացող խորդենու վերամշակմամբ, որից ստանում են եթերայուղեր:

Արմավիր համայնքում կա 2 ապաստարան՝ մանկապարտեզում և հիվանդանոցում: Որպես ապաստարաններ են ծառայում նկուղները, որոնք չունեն պաշտպանության անհրաժեշտ պայմաններ, համապատասխան կառուցվածք և այլն: Ըստ հարցվածների մեծ մասի՝ բնակչության տարահանման պլան և միջուկային անվտանգության վերաբերյալ ուղղորդող պաստառներ համայնքում չկան: Որոշ բնակիչներ ընդհանրապես տեղյակ չեն այդ մասին: Միայն մեկ բնակիչ նշեց, որ բնակչության տարահանման պլան առկա է դպրոցներում: Անվտանգության ուսումնավարժական պարապմունքներ, ըստ արմավիրցիների, իրականացվում են դպրոցներում: Դպրոցի հետ առնչություն չունեցող բնակիչները տեղյակ չէին ուսումնավարժական պարապմունքների անցկացման մասին: Դրա հետ մեկտեղ հարցվածներն իրենց իրազեկվածության մակարդակը գնահատեցին «բավարար»: ՀԱԷԿ-ի միջուկային անվտանգության վերաբերյալ իրավական ակտերի քննարկումներին հարցվածներից ոչ մեկ չի մասնակցել:

«Արմավիրի մարզում գյուղացիական տնտեսությունների 70 տոկոսից ավելին սոցիալական վատ վիճակում է գտնվում: Մեծամոր քաղաքը ստեղծվել է ատոմակայանի հենքի վրա: Նախկինում և՛ Մեծամորի, և՛ հարակից համայնքների բնակիչների համար սահմանված էին որոշակի արտոնություններ. 100 տոկոսով ատոմակայանը զիջում էր էլեկտրաէներգիայի վարձավճարները: Հետո դրանք վերանայվեցին, իջեցվեցին մինչև 70,

50 տոկոս, իսկ անկախությունից հետո վերացան բոլոր արտոնությունները» - այս մասին հայտնեց «Արմավիրի մամուլի ակումբ» ՀԿ-ի նախագահ Անժելա Ստեփանյանը:

Արմավիր համայնքում բնակիչների հիմնական զբաղմունքը այգեգործությունն է, բանջարանոցային կուլտուրաների մշակումը, անասնապահությունը: Կան ընտանիքներ, որոնք ապրում են արտագնա աշխատանքների հաշվին: Ոռոգման և խմելու ջուր կա, սակայն խմելու ջուրը վատ որակի է: Հարցվածների մեծ մասը նշեց, որ կոյուղաջրերի հեռացման կենտրոնացված համակարգ, մաքրման կայաններ չկան:

Զեռուցման նպատակով Արմավիրում օգտագործում են էլեկտրաէներգիա, գազ, փայտ և բիովառելիք: Ծախսերը տարբեր են. էլեկտրաէներգիայի համար ձմռանն ամսական վճարում են մինչև 30.000 դրամ, գազի համար՝ 50.000-80.000 դրամ: Ատոմակայանին հարակից Արմավիրում կան ընտանիքներ, որոնք ձմռանը փայտով են ջեռուցվում:

ԳԼՈՒԽ 3 ՀԵՏԱԶՈՏՈՒԹՅԱՆ ԱՐԴՅՈՒՆՔՆԵՐԸ

- ՀԱԷԿ-ի ազդակիր գոտու համայնքների բնակիչների անվտանգությունն ապահովված չէ ճառագայթային վթարների դեպքում:
- Բնակիչներին իմացությունը ճառագայթման և էկոլոգիական անվտանգությանը ներկայացվող պահանջներին մակերեսային է, հաճախ հակասական, նույնիսկ տրամագծորեն հակառակ անվտանգության պահանջներին:
- ՀՀ կառավարության ատոմային էներգետիկայի որդեգրած նոր քաղաքականության մասին տեղյակ չէին հարցվածների գերակշիռ մասը՝ 95%-ը:
- Չկա փոխհամագործակցություն ՀԱԷԿ-ի և ազդեցության գոտու համայնքների միջև: Հանրությունը ներգրավված չէ ՀԱԷԿ-ի ծրագրերի, կայանի հետագա վերազինման, ոլորտում որոշումների կայացման գործընթացներում, ՀԱԷԿ-ի ազդեցության գոտու ուսումնասիրված համայնքներում ոչ մի նմանատիպ քննարկում չի կայացել:
- ՀԱԷԿ-ը և կառավարությունը համայնքների համար սոցիալական ծրագրեր չունեն և նրանց չեն աջակցում:
- Տեղի բնակչությունը տեղեկատվություն չունի ՀԱԷԿ-ի ազդեցության գոտում օդի, ջրի, հողերի աղտոտվածության վերաբերյալ իրականացվող մոնիթորինգի, ինչպես նաև արտադրվող գյուղմթերքների որակական կազմի անալիզների կատարման, դրանց ընթացքի և վերջնական արդյունքների մասին: Եթե նույնիսկ կատարվում են անալիզներ, միևնույն է, բնակչությունը տեղեկացված չէ այդ մասին:
- Հնարավոր ճառագայթման վտանգի մասին բնակիչներն ունեն անբավարար իմացություն, դրան կանխարգելման և հակազդման համար բացակայում են համապատասխան միջոցները:

- Համայնքների բուժսպասարկման կետերում և բնակիչների շրջանում բացակայում են վահանաձև գեղձի արգելափակման համար նախատեսված կայուն յոդի պատրաստուկները:
- Բնակչության պաշտպանության համար նախատեսված անհատական պաշտպանության միջոցներ՝ զտող հակագազեր, շնչադիմակներ չունեի հարցված բնակիչների 100%-ը:
- Ազգային պլանով նախատեսված ապաստարաններ, թաքստոցներ և այլ պաշտպանական կառույցներ համայնքներում չկան: Որպես ժամանակավոր թաքստոց նախատեսված նկուղները և սպորտդահլիճները չեն համապատասխանում ճառագայթային վտանգիներից պաշտպանվելու տարածքներին և շինություններին ներկայացվող տարրական պահանջներին: Համայնքներում չկան բնակչության տարահանումն ուղղորդող պաստառներ, տարահանման պլաններ, բացակայում են վտանգի ազդարարման շշակները:
- Էլեկտրաէներգիայի սակագները ՀԱԷԿ-ի ազդեցության գոտու բնակիչների համար նույնն են, ինչպես ՀՀ մյուս շրջանների բոլոր քաղաքացիների համար: Ազդակիր համայնքներում չի կիրառվում դոտացիայի մեխանիզմը: Ջեռուցման նպատակով տեղացիների 70% -ն օգտագործում է վառելափայտ, քանի որ, ըստ հարցվածների, բարձր են էլեկտրաէներգիայի և գազի սակագները:
- ՀԱԷԿ-ն ընդգրկված չէ «Ընկերությունների կողմից վճարվող բնապահպանական հարկերի նպատակային օգտագործման մասին» օրենքով ամրագրված կազմակերպությունների ցանկում: Համայնքները չունեն «ազդակիր համայնք»-ի կարգավիճակ: Համայնքների բնակիչները օրենքով գրկված են շրջակա միջավայրի բարելավմանն ուղղված ծրագրերի իրականացման համար ՀԱԷԿ-ի վճարած բնապահպանական հարկերից մասնահանում ստանալու հնարավորությունից: Նրանք չեն կարող դատական կարգով վիճարկել նաև որևէ որոշում: